

国朝耆献类征初编

國朝耆獻類征初編

國朝耆獻類徵初編卷百十五目錄

詞臣一

額爾德尼

蔣超

劉子壯

唐夢賚

尹公亮

鄒忠倚

曹爾堪

張潛

耿介

郭棻

邱象升

弟象隨

徐元榮

孫承恩

吳國對

蕭惟豫

吳本植

國朝詩林卷百十五

國朝耆獻類徵初編卷百十五

通奉大夫前署江西巡撫江西布政使司布政使湘陰李桓輯

詞臣一

額爾德尼

額爾德尼世居都英額姓納喇氏 太祖高皇帝時來歸隸滿洲
正黃旗 賜號巴克什每從 上征討蒙古諸部能因其土俗語
言文字傳宣 詔令招納降附著有勞績天命三年 上親證明
取撫順師還明總兵張承蔭自廣甯糾眾追躡額爾德尼同諸將
還擊敗其眾斬承蔭敘功授男爵初己亥年二月額爾德尼奉
命同理事大臣噶蓋勅立 國書噶蓋奏曰蒙古字傳習已久難

以更製 上曰我國之語必譯蒙古爲語讀之則未習蒙古語者不能知也柰何以我國語製字爲難反以習他國語爲易耶額爾德尼奏曰更製之法臣等未能明故難 上曰無難也以蒙古字合我國語音聯綴成句卽可因文見義矣會噶益以事伏法額爾德尼遵 上指授獨任擬製奏上 裁定頒行 國書傳布自此始額爾德尼旣卒 太宗文皇帝復命儒臣達海庫爾禪等述其義益之天聰七年 諭文館諸臣曰額爾德尼遵 太祖指授勅造國書乃一代傑出之人今也則亡 世祖章皇帝順治十一年追謚文成子薩哈連官至鑾儀衛冠軍使改入大學士希福族中賜姓赫舍里

右 國史館本傳

國朝書牘類稿

蔣超

蔣君虎臣先生諱超字虎臣江南金壇人年二十二舉於鄉又二年舉丁亥進士一甲第三人官翰林修撰以文雄於時主浙江省試提督順天學政並清慎事竣告歸不過里門見妻子扁舟草屨徑自楚之蜀客死於峨嵋之伏虎寺朝士大夫之賢者歎異流涕蜀之大吏經紀具舟歸其喪某年月日將卜葬於某山之原於乎初君之訃至余爲文哭之許志其墓以君故善余言也君早入翰林攻詩文酷嗜書法人屏壁間一字可喜必鉤勒藏之心摹手追於晉唐行楷得其筆意爲人和易獨刻苦痛自下多布衣野老方外之交見之則磬折傾倒狎游不厭橐空亡一錢人告之急恆若

負重創門生故人有所餽送則以遺貧交比邱應手立盡視其齋
廚常齏鹽不給無悔也君既厚與人人益缺望小不遂則訶責交
至惟曲應之恐後時時以德報怨人或重背德誦言必絕之及其
人至則握手歡如初在朝數請假歸省其父僉事公祖母某太
宜人畱子舍不出既連卽世破產治喪葬且灸艾燔體以志哀痛
見者愍之其督學畿內也時學租並入正賦視學使者無所賫予
君舉債賑貧士又上疏請復古學禁天下有司刑責諸生每草疏
時先焚香籲天積誠以格宸聽疏皆報可秩滿輒謝病歸休
過嵩洛與孫徵君奇逢語數日以書來告謂不可失此人辛亥春
君次長干僧舍予適在江甯要予出見大事相切劘委重丁甯若

相訣別自此而躡匡廬遊鹿門兩年之間直達峨嵋矣君始生之
夕祖母夢爲峨嵋老僧見君生則解顏豐於饌客而自饌斷葷血
二十年至是愛峨嵋山伏虎寺會當事請修四川通志峨嵋縣志
不得辭數月書成卽山中建一亭書蘿峰二字語小僮曰歿厝我
於此癸丑正月遺書別當事越三日沐浴端坐畱詩而逝翌日蜀
人胡生嘗從君遊者見諸山椒頻呼蔣先生不應旣入寺然後知
君歿皆大驚歎以爲非常人也君生明天啓甲子先是有術者言
其壽止四十九君篤信之爲詩四十九篇至是歲果符合云君家
世業農大父芝田公有隱德生子諱鳴玉舉進士爲聞人累官山
東僉事母某太宜人生二子君爲長其季曰進金壇縣學生君之

子顯祖并力學有才行女適宦族君平生遊歷五嶽及黃山九華
天台武當窮幽極邃不避蛇虎嘗語我曰僕有不可解者三略貴
顯而禮窶賤畏館閣而癖山水薄妻子而篤比邱三者是也所著
有綏庵詩文集若干卷論史百篇蔣說等書惟儒宗辨統輯彙未
竟嘗戒忿怒自號無瞋道人又以家近華陽洞未歿前數日自敘
有華陽山人傳云銘曰

華陽山人邪無瞋道人邪峨嵋比邱邪其儒而禪者邪於乎論其
行誼非曾閔之徒邪

右墓誌銘施閏章撰

虎臣幼耽禪寂不茹葷酒祖母夢峨嵋老僧而生年二十四及第

晚附楚舟入峨嵋卒於伏虎寺臨化有詩云脩然猿鶴自相親老
衲無多溷孽塵偶向鑊湯求避熱那從大海去翻身功名傀儡場
中物妻子枯骸隊裏人只有君親難報荅生生世世祝能仁

右池北偶談王士禎撰

劉子壯

劉修撰稚川先生者黃岡人也諱子壯字克猷其先江西清江人遷黃岡團風鎮四世而生贈公贈公二丈夫子伯克章先生其次也贈公暨太孺人蚤卒先生鞠於季父髫齡穎慧讀書一目數行下屬文奇肆甚弱冠登崇禎十三年賢書洲居有文昌閣先生下帷其中博綜六經左氏公穀史漢暨唐宋大家書戶外事不聞也順治六年成進士廷對策萬言其略曰陛下統一海內子惠元元隆祀典以達孝廣試額以求賢罷廠衛以甯人去宦寺以謹始近且勤召對以開言路弛養馬挾書之禁寬隱匿連坐之條亦既湛恩汪濊寓內嚮風矣然猶發德音下明詔廣覽兼聽取法上

古此三公九卿之任非臣草茅新進所能及也然臣愚述所聞誦所學竊以爲二帝三王治本於道道本於心故講學爲明心之要修身爲齊家治國平天下之本請經筵講讀致知而力行之以敬爲正心之功以誠爲復性之道以仁爲成已成物之全復古者曰御便殿之制令大臣取內外章奏面相商訂諫官仍得於仗下封駁上下情通滿漢道合宰輔不僅以奉行爲職卿貳不僅以署紙爲能則中心隱微皆可告語而海荒萬里如在目前由是蠲荒賦以裕邦本并屯衛以杜隱占清釀成之源弭禍亂之萌以消寇盜立滿洲學設教習以同風俗敷文治斯享國億萬年而臣民咸獲厚載無疆之福者將在茲乎 天子覽之大悅於是臚傳第一授

國史院修撰如經筵滿洲學教習屯衛諸大政悉著令甲次第舉行之八年分校南宮得二十有二人皆天下知名士尋請告旋里明年疾卒享年四十四元配張先卒繼曹侍讀學士曹公本榮姑也子孫茂甫二齡先生天性孝友諸父伯兄歿弟姪五六人孤弱拊而訓之婚娶成禮雖亂離不苟也嘗過崑山令雅與厚善願以千金爲壽有小吏獲罪急請救用將嫁女貲數十金餉先生先生聞而止之吏恐解脫不力因諭之曰毋恐不費爾一緡也入白令令不可則曰第貰吏罪卽拜賜千金矣令不得已從之吏乃得脫而女婚以全然終不以告人也邑子某遭兵亂妻被掠至京爲貸百金贖歸後生數子戶口大蕃息南歸抵家垂橐蕭然如布衣諸